

أوجاع متوحشة  
ماهر مهران

---

أوجاع متوحشة

شعر

ماهر مهران

الطبعة الأولى ٢٠٠٨

دار اكتب للنشر والتوزيع

٠١٢٩٢٥١٥٩٢

المدير العام : يحيى هاشم

[www.oktob.net](http://www.oktob.net)

[dar\\_oktob@gawab.com](mailto:dar_oktob@gawab.com)

رقم الإيدع : ٢٠٠٧/٢٦٥١٦

تصميم الغلاف : رانا عمر

# أوجاع متوحشة

شعر

ماهر مهران

الطبعة الأولى

٢٠٠٧



دار اكتب للنشر والتوزيع

## قصائد قصيرة

(١)

- واقف في طريق طويل

شبه الحياة ..

لا الخطوة واحداً لي — بدايته

ولا قادر أوصول منتهاه

وادي

(ع) أغوص قوي في الرمل

(ع) أغوص أنا والحمل

لا إيدي متشعلقة (ف) قشة

ولا رجلي تحت منها حصاه !!

\*\*\*\*\*

(٢)

– لما

تاه يوسف

إبيضت عينين يعقوب

(م) الحزن ..

وأنا

تاه أبويا

وتاه أخويا  
وتاه ولدي  
وواد ولدي  
وواد واد ولدي ..  
يا اااااااه ..  
تقل الرمش على عيني  
وسقط اللحم  
من عروق كبدي  
وما عادتش ريحة القمصان  
تقدر تديني الحياة تاني !!

\*\*\*\*\*



(٣)

نضحك

ونلعب

وناكل الحياة دي أكل ..

وقبل الفجر ما يشقشق

نرجع كل ليلة

بـ هزيمة شكل !!



(٤)

- كوره شراب أنا

بس إنتي ما تدري ..

و (ع) أنط

وأفط

وأطير كمان

وأجري ..

واستحمل التوهه  
ما بين رجلين البشر  
وأقول بس عزم ما عندي :  
إيه يعني أتفك  
ويتنحشك القطن مني ؟!  
ما دام في كل مرة  
(ع) يفضل سليم في  
عمودي أنا الفقري ؟!

\*\*\*\*\*

(٥)

- أوف ..

تلج (ف) صوابعي

أوووف

مرار في كنفى

أوووووف

.

## نااار في جنبي

أووووووف

موووت في قلبي ..

يعني كان لازم

## تاخدي الشمس وياكي

وتسيبيلي الشتا وحدي ١١٩

\*\*\*\*\*

(٦)

- صاحي

لكن نام

ومتهيا لي راكب قطر ..

فجأة

فتحت عيني

لقيت ما بيني وبينه

ألف بحر

وبحر

قلت أجري وأحاول أتشعبط

أتاري تحت مني بربيط

وقدامي جبل من صخر !!!

\*\*\*\*\*



(٧)

- سمعت هاتف (ع) يقولي :

عليها

وعيش ..

هايفرق إيه سبت وجمعه

من أربع

وخميس ..

لو تفضل ماسك في الأحزان

هاتضيع إنت

والحزن يعيش !!

(٨)

- النمل

الماشي ورا البلياتشو

تقولشي عيل ماسك دايل أبوه ..

لو

جرب مرة يخطي شمال

لو

جرب مرة يخطي يمين

لو جرب مرة

أكيد راح يوصل

ومؤكد خالص مش هابتوه !!

\*\*\*\*\*

(۹)

آي

آي

آي ..

ليه يا زمن ؟!

وازاى

تعيشني فوق السحاب

وبعدها تهد حيلي  
وترخي العصب ..  
تسلمني فريسة سهلة للتعب  
وتنتري كإني حنة حديدة قديمة  
نترها ياي ١٩  
رد الزمن وقالي : يا مسكين  
اللي حصل ده  
هايحي إيه  
جنب اللي لسه جاي !!!  
آي  
آي  
آي

---

(١٠)

- لو

في إيدي حصوه

أو قدامي قالب

كنت فقعت عينك

وبقيت للحظة غالب

وصرخت بـ علو صوتي :

العتمة أرحم

وأحن

من فجر طالعلي كاذب !!

\*\*\*\*\*



(١١)

- كل ما إيدك الناحلة  
تمسك حفنة كيماوي  
وتطوحها في العتمة  
عشان ما ترسم هلال ..  
تتخبط رجلك في بعض  
وتتكوم قوي (ع) الأرض

تقولشي نخلة عجوزة هزمها الريح ..

(ف) يا سيد المجاريح

زحزحه العتمة

زي زحزحة جبال الموت

طعم القرض في الخلق

نومة الحزن فوق كثاف الخلق

زي تشخيرة الجبال ..

زحزحة العتمة

هي نن عين قلب المحال

(ف) طنش

ولف إيدك على وسط نانسي عجرم الخديعة

وإبدأ الرقصة !!

(١٢)

- يا للي (ع) تبنا جوا مع

وترينوها بـ رخام ..

يا للي (ع) تبنا كنايس

تمام التمام ..

فيها إيه

لو تبنا شوية عشش

لملايين طحنها الرصيف  
والسقيع والضلام ..  
ولا هو لازم يتبنى منبر  
عشان يتعرف مين فينا مأموم  
ومين الإمام ١٩

\*\*\*\*\*

(١٣)

- قزاز

ورا قزاز

ورا قزاز ..

أنا شايف الصورة

مehزوزة في البرواز ..

الإيد شايفها رجل

والركبة بزاز ..  
والراس حزمة قديمة  
والضافر شفة غاية في الإعجاز ..  
هو أنا صابني العشى  
ولا الدنيا صابها الإهتراز ؟

(١٤)

- عايزاني أحبك  
وأعدي في بحر حبك  
أنخر حدود الجنون  
طب إزاي ؟  
وكيف ؟  
وبـ إيه ؟

وانتي اللي بوظيتلي دماغي

والقلب

والمعدة

والكبد

والقولون ١١٩

\*\*\*\*\*



(١٥)

- طول ما أنت

ما (ع) تلقط نفسك بالعافية

و(ع) تكلبش بسنانك

في كرسي العرش ..

- طول ما أنت

ما (ع) توطّي

قدام اللي ما يتسموا  
وتأدي فواصل الرقص ..  
- طول ما أنت  
ما (ع) تستعفي علينا  
وتعمل دراكولا  
وتزل  
في دمن مص ..  
بيقا قول (ع) الدنيا  
يا رحمن  
يا رحيم  
واستنا تخرب مالطة  
ويسود الهزار  
والههص !!

---

(١٦)

– أنا غي

أنا غي

أنا غي

أيوه

أنا هاعترف

وأنا بين إيديكم :

إني غبي ..

أنا اللي كنت

فاكر الدنيا ماشية عدلة

فجأة لقيتها

سلم لولي !!

\*\*\*\*\*

(١٧)

- عايزني بضلوعي اللي تتعد بالواحدة

أتحدى الكون

وادشدش راس تعبنا الرومي

والفارسي ..

واحمي عقارب

ماله الجو حواليا

وأحطم قرادة مكليشة ف وشي ..

وأحط سم لفيران

(ع) تنخر في مدادات عرشي ..

وأحرق هالوك

وعليق

واعتني بـ حشى

وأدمر بيوت العنكبوت

المبنية من قشى

وأقلع شجر الظلم م الترة

وأقول لغيمه سوده

غوري كده إمشي ..

طب إزاي

هعمل دا كله

وأنا اللي شاب شعري

ومش قادر أتغلب على نفسي !!؟

\*\*\*\*\*

(١٨)

- يا ناس يا واقفين على حافة الحفرة

يا مسلمين

يا موحدين

ويا نصارى

ويا يهود

ويا كفرة

يا قلوب أنشف من مناخير جاموسة

ويا وشوش باهتة قوي وصفرا ..

فتشوا عني

وإن لقيتوني يبقا لقيتوا روحكم

وظللتوا (م) الحفرة !!

\*\*\*\*\*



---

(١٩)

- فوضى

فوضى

فوضى ..

فوضى منشرة

كأها نوش

وبلاء ..

اللي تقول عليه إبتدا  
تلقاه في حالة انتهاء ..  
واللي تقول عليه انتهى  
تلقاه في حالة إبتداء ..  
فوضى في الكل  
فوضى في البعض  
فوضى في الجمع  
وفوضى في الأجزاء  
وتأشيرة خروج بلا عودة ..  
فوضى  
فوضى  
فوضى

(٢٠)

- الحمار

اللي من زمان (ع) نركبه

ونضربه

وبسن المطوه (ع) نزل فيه تقطيع

معارفش ليه

ما رافعش راسه من المخول ١٩

ولا (ع) يحاول ينفذ ودانه ١٩

وليه بطل البرطيع ١٩

\*\*\*\*\*

(٢١)

- مجنون

وها أبتجنن

وليه ما أبتجننش ١٩

مش كل ما أوريك

غماصك في المراه

تصرخ

وما تصدقش ؟  
مش كل ما  
أشتمك ريحة العفن  
تقول : كلامك دبش !!  
مش كل  
ما أديك آيه للحقيقة  
ألفاك  
تخطني تحت جزمك  
وبغلك المعروف  
تدوس على قلبي  
وتهرس !!  
وتقول : مجنون  
وها أتجنن  
وليه ما أتجننش ؟

\*\*\*\*\*

(٢٢)

"- يا طبطب

يا دلع"

حزب الوفد ولع

الناس (ع) تشرب فقر

روبي عمالة تتدلّع

ليلة غرق العبارة

وطني حامل (ع) يرجع  
عمر أفندي انخطفت  
أمي عمالة تتوجع  
أبويا مات (ع) البرش  
وما حدش عارف أمته  
جنازته ها تشيع ؟  
حلقي ترعة شيع  
قلبي ورقة (ع) تتمزع  
لكن ماشي و(ع) أغني :  
" يا طبطب  
يا دلع "  
حزب الوفد ولع !!



(٢٣)

- لو تقول (ع) الحزن

ترخص

وما تطولش

غير الشماته ..

وتقل

والهية تنقص

تقولشي كلبة عافتها الكلاب

ونامت قدام السباته !!

\*\*\*\*\*

---

(٢٤)

- يا لله

غمض عينيك

وخطي الخطوة دي لـ قدام ..

إعند وزاحم وعافر

وعديها بانسجام ..

وإياك تفتح شبايك صدرك

لريح التردد ..

دا ياما التردد

قتل جوه مننا أحلام !!

\*\*\*\*\*

---

(٢٥)

- أنا لها

أنا لها

أنا لها

أيوه أنا اللي قلت :

قادر من غيط حروفي

أخلق دنيا حلوه

وأعشقها  
وأحبها ..  
ما كنتش عارف إني  
لما هارسم سنابل  
هياكلها الجراد  
ولما هارسم نيل  
هايتوه في البلاد  
ولما هازرع أغاني  
هايقتلها العطش  
ولما هاخلق بشر  
هتاكل بعضها !!!

(٢٦)

- سيبك يا قلبي  
من أمور السياسة ..  
دا كل ما تعدي نكسة  
هاتلقي انتكاسة  
وعليك بدنيا الرقص  
والدلع

والفرشة

دنيا لا فيها البدن (ع) يقشعر

ولا الروح (ع) تصيبها ارتعاشة ..

\*\*\*\*\*



(٢٧)

ساعة ما بستك

ساعة ما بستيني

الخوف كان وحش (ع) ينهش مصاريبي

وكانت إيديكي شهد

ورقتك شهد

وصدرك شهد

وشفايفك شهد ..  
طب إيش حال  
لما نبوس في بعض  
بس من غير خوف !!؟

( ٢٨ )

- يا أيها المستضعفون

الخانعون

الخاضعون ..

يا للي كسفتكم حكمة موسى

ورمت بكم عرايا

في برد السجون ..

إمته

هاتشدوا عروقكم  
وتمسكوا ولو مرة  
بـ عصا فرعون ؟

\*\*\*\*\*

(٢٩)

## ع الرصيف

- حط الليل دماغه

على صدر البيوت

وابتدا صوت المدينة

يروح في الخفوت

وابتدت السما ترمي علينا  
مطر خفيف  
وأنا وانتي يا حبيبي  
لسه واقفين (ع) الرصيف !!

- نغني يتحبس صوتنا  
نمشي نتسلى بسكوتنا  
نخطي فتأخذنا خطاويننا لموتنا  
مع إن صوت خطوتنا فوق الأرض  
زي صوت خطو الملائكة  
هادي وخفيف ..  
واحنا بنمشي (ع) الرصيف ..

في إيديكي برد وارتعاش  
في قلبي حزن وانكماش  
وادي ليل الكون خلص

أما ليلنا ما انتهاش  
ولا كان حنون  
ولا كان لطيف ..  
واحنا واقفين (ع) الرصيف

- نرسم في الفراغ ورد ونخل وشجر  
نركب الجناح ونطلع للقمر  
وأما نفتح عينينه  
نلقى الكون جفاف  
والشارع مخيف  
وألقاكي يا حبيبي  
واقفة جنب مني  
بتبكي على الرصيف !!

1

2

3

4

5

6

7

8

9

10

11

12

13

14

15

16

17

18

19

20

21

22

23

24

25

26

27

28

29

30

31

32

33

34

35

36

37

38

39

40

41

42

43

44

45

46



---

(۳۰)

کمیش

نازل حشیش

طالع حشیش

هو أنت إيه

یا عم کمیش؟

- الأرض أكلت بطن الضوافر  
والدنيا سكنت وأنت المسافر  
وأنت المعاند  
وأنت المعافر  
وأنت اللي قادر  
وأنت اللي صابر  
وعاملي نخلة  
دنياك يا دوبك تينه ونبتة  
وزرزور  
وقمحة ..  
لكن يا بويا  
مالكش بصمة ..  
ومالكش فيش  
نازل حشيش  
طالع حشيش  
هو أنت إيه  
يا عم كميّش !؟

- طيابة تاخذك

وريح نجيبك

ماشي بتشرب في دموع نجيبك

لا حد عارف إيه اللي خضر جوه (ف) كفوفك

ولا حد عارف كام جوه جيبيك

ماشي وراضي

والله بنصيبك ..

لا قلت راح

ولا قلت جاي

ولا بكيت

ولا قلت : أي

حتى في مرة

الدنيا عندك تشبه لترعه

وأنت يا دوبك صفصافة مايلة

أو عود عجوز من بوره هيش

نازل حشيش

طالع حشیش  
هو أنت أیه  
یا عم کمیش ۱۱۹

- یحوک و یعرج  
یمشی مدلدل  
یزرع ویقلع  
وینام مبهدل  
و(ف) قلبه تطلع زرعایه حضرا  
وکفه یکسر صوانه سمرا  
وصابعه یشاور کانه لورد علی قلب جیش ..  
نازل حشیش  
طالع حشیش  
هو أنت أیه  
یا عم کمیش ۱۹

- لا سنانه عرفت تقزقز لب  
ولا قلبه مرّه جرّب يحب  
عايش في أرضه تقول في حرب  
فرحة كرب  
وكربة كرب  
وصيفة مليان سقعة وعتمة  
لا ليه صحاب  
ولا عنده له  
كل حلمه محتاج لـ تكوه  
أو حتى ضروره  
أو عصاية يسند عليها  
أو حضن دافي في دفاه يعيش  
لكن تملي نلقى زمانه  
يكشر في وشه  
وبعلو صوته يقول : مفيش !!  
نازل حشيش

طالع حشیش  
هو أنت آیه  
یا عم کمیش !!؟

(٣١)  
كاملة

- في حنة أرض وسع حصيرة  
(ع) يخاصم صيفها الضل  
والعطش فيها متربع  
لا (ع) يسافر

ولا (ع) يحل

ولا (ع) تطلعها الميه في الفيضان ..

حتة أرض أكبر سنة من قيراط

وأصغر وأصغر من فدان ..

حتة أرض شراقي

مسكينة

ذليلة ذلة عيل يتيم الأين

(ع) تلازم جلايته الكستور بقع الريمخ

ويلازم وشه المصوص التكشيرة ..

في حطة أرض كد حصيرة

طلعت على غفلة نواره

تشبه سحر خضار الكمون

مهجة شجر الخشخاش

نواره سموها ملايكة نص الليل

كاملة بنت أبو محساس ١١

يشيلها أبوها على همومه



ويعشي يتحنطق  
تقولشي ماشي على قلب الشوك  
على سكه مبدوره قزاز  
على مرجيحة طويلة من الهزاز  
ويحود (ع) الدكاكين  
يخلي القافلين فاتحين  
ويشتري ليها لب وملبن  
ويخلعه معجونة بالسكر  
تتشاقى كاملة أكثر وأكثر  
وتقوله : عايزة من التانيين  
(ف) ييلع زوره الناشف  
وتقول ضحكته لـ عينيها الحلوين  
من قلبي  
من نن العين  
(ف) يضربوا أهل بلدنا كف بـ كف  
وتطلع علب اللف

ويقولوا : اتعفرت أبو محساس  
ماشي يدلح في الفقرية  
تقولشي هاتجيب النور للدار  
ولا ها ترجع كرسي العمدية  
بتاع المكحوت جده أبو محساس ١١  
- يدوب ليلة في كباية الشاي  
يعمل عضماية رجله  
مزمار وناي  
يقعد يهندس أيامها  
أفراحها وأحلامها  
كانه فلاح مطحون  
لقى فجأة شجرة أفيون  
نبتت على غفلة وسط فولاته ..  
فلاح (ع) يدوس على انتكاساته  
ويكير منجاية طلعت في البنكيك  
زيها تكير كاملة

بالخززان السارح  
والرمان الطارح  
والشفة اللي تشبه فجر زمان  
والضحكة اللي (ع) تجلي الأحزان  
والخد اللي (ع) يفوق عجينة القمح الخمران  
وفوق الكيك ..  
كبرت كاملة  
زي ما (ع) تكبر شجرة مشمش في البنكيك  
ودارت زي فراشة غيط  
طلعت كل قلوب الجيبة  
بره البيت  
تتمخطر (ف) تطرح القيالة ضليلة  
ويطرح شجر الحب  
ونار الغيرة  
لما فرسان العيلة يبوسوا تراب خطاويها  
ويخلوا كاملة كعبة

وهما عرايا  
ومفيش في لسانهم غير لبيك  
لكن كاملة كانت ناصحة  
رفعت جلاليتها لفوق الركبة  
وقالت : ساعة يختار العقل  
يختار الحواديت ..  
وقطفت ورداية  
وغنت غنواية  
ورفعت إيدها لعصفورة (ع) تسكن قلب النبقه  
وقالت :  
بالذمة فيه أحسن من عصفورة  
(ع) تغني لوليفها في الأعشاش  
وبعدها دابت زي الطيف الحلو  
حبة حبة في عيون الناس ..  
تمسك سنارة وتحاول تصطاد الشمس  
تعمل زي الملكة فريدة

وتتصنع فوق العرش  
وتضحك على غفلة زي المجانين  
وتبكي زي المجانين  
تنزل (ع) الترعة وتمسك حفنة طين  
وتعمل سيف  
وحصان  
وواد خيال  
تنعم بحده  
وتساوي (ف) شنبه وفي الرمش  
وتبكي لحد الخد  
اللي يشبه طعم الأحلام يتكرمش  
ويسود زي حنك القرن  
لما طينه التمثال اللي (ف) إيدها  
ما تستحملهاش ..  
(ف) تصرخ صرخة تهر الكون  
وتقول : يا مراك يا كاملة

يا بنت أبو محساس ..  
وغمصص في الجوزة  
وتعاتب شبح الصبح  
اللي تاه في بلاد الله  
وراح ولا جاشي ..  
لكن تتسند وتقوم  
تخلي الشرطة تساوي يوم  
وتدي للكتكوتة حياة ..  
تدي فرها  
نذلتها/  
رهة بيت السبع /  
تينتها /  
تدي أوجاعها ساعة تصرخ آه  
تدي الصخلة  
والأوهام  
وتللمل روحها من تحت ثياب الحزن

وكأنها عترة عجوزة غلبت ثقل الجرن  
وتقولك : مش برضه أنا زي النحلة  
اللي طول اليوم (ع) تزن  
وما تملّش  
ولا تهداش  
مع إنها عارفة إن الدنيا  
زي ضلة نخلة  
ساعة ما نأمن ليها  
ما نلتقيهاش ..  
عشان كده  
هارفع توبي فوق الراس  
وأقف قدام البيت  
نخلة (ع) تخرط دمع وحواديت  
وهشخبط في ترابنا الحامي  
واستنا ملاك الموت  
اللي كل ما يجي

وأقدم له روجي  
ويا كباية الشاي  
يعوفني  
زي ما (ع) تعوفني كلاب السكة  
والأوباش  
ويقول بالحس العالي :  
لو ترسى على كاملة  
يقي بلا اااااش !!

\*\*\*\*\*



(٣٢)

حميد الحاج هلال

كل ما أشوفه  
أفتكر على طول  
قربة ستي يرحمها الله ؛  
وش مقهى

جلد مصدي  
لا مرة لمست عينه صابونه  
ولا مرة الميه كانت بالاه  
جلد أنشف من بتاوة قيصي قديمه  
من خشبة سنط  
لكن بيشيل جواه  
كوليرا  
وملاريا  
وبلهارسيا  
وحنوشة  
ودود بيلم عليه جيش الدبان  
يرمي حلقا على الصللان  
يخلي الديب الزرباوي متلقح تحت الحيط  
و(ع) ييكي حيله المهدود  
وكأنه من كتر الكرب  
زرعه نسيها المخاليق

ونسيها كمان الرب  
وقعدت مستنية نلعب فيها الكورة  
زيها يتلقح فوق السيحة  
ويسيينا نعد سنين العمر  
حوالين الهين المزرورة  
شتوية  
شتوية  
وحول  
حول ..  
نعد والعد يطول  
وكل ما نروح في العد  
نلقى حيلنا إقهد  
روحه تقشر جلد الأحزان  
وزي يياضه في قلب الترعة  
تبرق  
وتضوي

وتلالي  
(ف) يبلع حفنة سلفا  
ويدوس (ع) البرييط  
والشوك  
والخلفا  
ويعدي ييوس الطين  
يمسك بذرايه وشتلايتين  
ويقولك بالحس العالي :  
" أحسن حاجة "  
يعملها البنى آدم في الدنيا دي  
إنه يرمي في الأرض غلالي  
ويحط دايله في سنانه  
ينط صخور الفقر الأبدى  
اللى يتمسك في صوابع رجله  
اللى عامله زي لسان المحرات البلدى  
وتكومه في الطين ..

(ف) تطير من جيبه

حتة جلده قديمة

عليها صفار

وخضار

وسباخ

وذبل حمام

عاملين دايرة حوالين صورة

لواحد (م) العهد الفرعوني

جنبها كتبوا بالخير الأسود خالص :

حميد واد الحاج هلالي

- يتخلط الطين

بغماص العين

بالعرق

بريحة السنين

بنص رغيف ناشف

بحبة حلبة

بشوية جنبه مهروسين  
بالوجع  
معلامح نفس مكسورة  
بغنوتين مجروحين  
(ف) ينجي في الجيب الكبير خييته  
ويصغر جوه الصديري  
ويقول : لو على الواقع  
كلنا واقعين  
بس المهم اللي يقع واقف  
واللي يقدر يصبر  
على حد سيف القدر  
وعلى قسوة أمشير السنين  
وزي الحاوي  
يرقص عصايته الجريد  
يلم عيال البلد  
يتحنجل

ويخلي اللي أبوه ميت  
كأنه (ف) عيد  
ويغني لنا : هلاي أنا ..  
أنا هلاي  
وقوام يداري الرقعة في جلايته  
لما يقولك : متربي على الغالي !!  
- وزى يوم أمشير  
متغيرة أحواله  
يوم مزهر العمه  
والقفطان  
وعلى الوش ضحكة عمدة  
شارب له قرش حشيش  
ويوم مرمى تحت قسوة النورج  
تحت السباح  
والعيش  
والردم

والهيش ..  
وكأنه كلب مستطري النوم في نقّاعه  
أو غراب ييحب النوم في الهويس  
ويبغي أغنيته الوحيدة للقمره  
يفرد أحلامه قدامه  
يلعن سنسفيل أيامه  
ويتمنى يجيه الموت  
(ف) يلقي ملامحه ظاهرة من تاني  
في نواره فول  
لوزة قطن  
عود حلبة  
سنبله قمح  
ريحة برتقان  
أو حتى في ورقة توت  
(ف) يحس إن خطوته  
علمت في الدنيا



لما شرب الموت  
وهو في سوق الرجال غالي !!  
- ياخذ نفسه بالعافية  
يجر في رجله جر  
يرمي هزائمه وراه  
ياخذ أحلامه معاه  
ينط كأنه جنيه بحر غاوية الرقص  
يتخلط حمار الخد  
مع دمع اتحبس في عينيه  
وتقول نايات الحزن اللي فيه :  
" ملعون مشوار تروح ليه مضطر "  
إنما جريه ورا الفراشات  
ومعاكسة الستات  
وروحته يوماتي لغاية الكولة  
جريه حافي لغاية البنات في الطاحون  
فعدته تحت السنطة العجوزة

عشان الصيد

يروحهم وكأنه رايح عيد ؛

- يطوح صديري أحزانه

- يعمل وجعه جريد

- ياخذ خيط من خيوط الشمس

- يعلق قلبه الأبيض إشارة

يطوح قوي السنارة

وكانه خيال يتمطوح على فرسه

أو طيار يستعرض بطيارة

ويعدي مطب فظيع

وصعب !!

- يبلع غيظه

ويستنى لوحتي صيره قمر الكعب ..

يلبس جلابيته الخيش

يعمل ولي

ودرويش

- يكي

ويتشحتف قصاد الرب

(ف) تلعب يا عيني سنارته

وتتدلى ريالته

ويحمر وشه

ويخضر

وينشك في سنارته

- يطلع لسانه للصيادين

يفقع ضحكتين مكتومين

ويا دوب ثواني

وتلتقيه يسب الدين

يخش في الأزمة

لما يلاقي سنارة أحلامه

سابت بياض الترع

واختارت للأسف حزمة

وسابته يصغر قصاد الكون

وقصادي  
وأنا باضحك  
وأولع له آخر سيجارة  
وأقوله : " ما حدثش (ع) ياخذ غير نصيبه  
وأنت دا نصيبك يا عم هلالي "  
- ترد فيه الروح  
لما الميه تبدأ خر  
يتصاحب ويا زروزور السقيع  
ويعاشر حنوشة الحر  
يمشي في الأراضى البور  
تبتسم ليه  
وعشان عينيه تخضر  
لا مرة خدته نومة الصبحية  
ولا مرة رفع مناخيره لفوق  
واتعالى  
أو إتكبر

ولا مهما عليت غناوي عياله ساعة المحصول  
بدل طبعه  
واتغير  
ماشي دائماً  
والشق في الرجل ينوم حنش  
لكنه يقولك : حلوة الدنيا لو تعشقها  
مرة علقم  
لو تعيشها - يا بطل - مجبر "  
- يطلع من الغيط  
وكانه تعلق طالع من الأدغال  
ناسي هزة وركه على خيله  
تزهيرة الشال  
تطبيقه مناديله  
حد السيف اليماني  
ونعومة البندقة الألماني  
ف يتنهد

ويبتسم  
تقولشي ولي بيعاني  
ويعمسك قطرة عرق لازقه (ع) القورة  
يطوحها لفوق  
يرميها للعالي  
وكل ما تشق توب العتمة  
وتعلي  
وتعلي  
نشوفها في عز العتمة  
تضوي  
وتلاي  
وترسم ملامح وش  
يحلف كل مين شافه  
إنه بالضبط  
الخالق  
الناطق  
وش مولانا وسيدنا  
حميد واد الحاج هلاي

(٣٣)

## ألم الدور

- أنا مش موظف

بـ امضي حضور

ولا (ف) حبك

عبد المأمور ..

أنا بأحبك بإرادتي  
بإرادتي ممكن أَلَمْ الدور ..

- أصبر عليكِ تاني ما أقدرش  
بعد أما حبك بان (ع) الرمش  
يا حبيبي محتاج مرة أحس  
إني في حبك مش مكسور

- أنا في حضنك  
نفسي أعيش  
باديكِ حب وما بخلش  
ليه انتي دائماً ما بتديش  
وليه تعالى ما بينا السور

أنا تعبت من الوقفة  
قابليني لو حتى مصادفة



دا كل وردة ولها قطفة  
ومفیش فراشة  
تخاف (م) النور

أنا مش موظف بامضی حضور  
ولا فی حبك عبد المأمور  
أنا باحبك بإرادتي  
بإرادتي حبك بإرادتي  
بإرادتي ممكن أألم الدور

## الشاعر في سطور

ماهر مهران

مواليد قاو العثمانية - البداري - أسوط في ٢٨ مارس ١٩٦٨  
حاصل على جائزة أخبار الأدب لشعر العامية عام ١٩٩٨ م .

### صدر له

- (١) هفصقات النخيل . إبداعات ١٩٩٩ م .
- (٢) عزيزة . هيئة الكتاب ٢٠٠١ م .
- (٣) أختائي أشجار السنط . مكتبة الأسرة ٢٠٠٣ م .
- (٤) الخدمة . مكتبة الأسرة ٢٠٠٥ م .
- (٥) أوجاج متوحشة . اكتب ٢٠٠٧ .

## الفهرس

٤	(١) قصائد قصيرة
٦١	(٢) ع الصيف
٦٥	(٣) كمبش
٥١	(٤) كاملة
٧١	(٥) حميد واد الحال هلال
٨١	(٦) ألم الدور

